

ملیان تطیف

# فراق عراق

مصائب وطنه آغلایان برفاچ نشیده

در سعادت

۱۹۱۸ — ۱۳۳۶

محمود بک مطبعی



سلمان تظلم

# فراق عراق


مصائب وطنه آغلایان بر قایچ نشیده

در سعادت

۱۹۱۸ — ۱۳۳۶

محمود دین محمدی





404.~T

## آئینه

قریبی اوده سنه ده آنجه ایکی دفعه زیارت ایدیه بیلیم .  
 حق سزگنه و دفا سزگنه بک بکزه بین بوگناهی اوفتدیرمه  
 و عفو ایدیرمک ایجهز سمدی کشا ایلم برنزار انسا ایدیرم که ؟  
 وطن محبتی قضاکی بسیریدن صده ده اولدجه و وجه اندک حیرم  
 صیغدن بوکسن ایندر ، اناسیتک قلبنه جای قبول  
 و جای تحس بولدجه طواف اولدجه ...

احراف ایدیرم که بهر بودرلری کاغذ اوسته دوردگیم کوندر  
 سنی دگی ، سندن دالها بویک ... فصحانیم جفتی و  
 منون اوله جفتی بیدیکم ایچون سیلورم آتته ! ... سندن  
 دالها معنز والده اولان وطنی دوشونوریم . و محض اولی  
 دوشونیم . سن ، گوزریمک ضایع سرکیده قلمش  
 مددزیادی قوروددن شوره خاطریم گله بیدک .

اون سنه اول جفتی دیون آلمه ننگ - ماتوله



استهزايده جك درجده سوخ دساته اولان - طور قيرنه  
 گوهشم . بولگون ده روغلي - مقدر آتە بوغيمه  
 آغديون - ديار تارمارك قويلرنه رن ايدورم . سن  
 دنيا يوزنده كي ييكسكلكي اوچوللرده دالها آتە  
 ايدرسك . اوچوللر كه آتە يوكسك برافوتما ساس اولان  
 ( ماردين ) قصبه سنده كي ماردين بابام ده ، اتمانكه  
 بوديقه ده غم كي نوضه سار اولور .

آه آتە !!  
 كاشكي به يالئز سئز او كوزك اولسەدم .  
 ويالئز سئز او كوزك اولمەدم ، قومه سە اول  
 ئولسەيدم ده بويە تيم وطن و تيم تاريخ قالا سەيدم !!  
 سەلەلاني ،  
 سنده حومه بخت  
 اوغللك

ایواہ ! ..

روان پاک محمد سہادہ کریاندر ،  
مخلداتی اسلامک ایٹدیلر تحریف :

امام اعظمک آفاق اجتہادندہ  
ایدر مجادلہ ناقوس ایلہ اذان شریف ! ..

۱۵ مایس ۱۹۱۷



## حسین مظلومه

سر مبارک ای قرّه دوچشم رسول ،  
شهادتکده سنک تن جدا اولوب کیتدی ؛

بوکونده ، طالع اسلامه باق که ، شهیدی  
ویروب عدویه یتیم وطن جدا ایتدی .

۱۶ مایس ۱۹۱۷



## دجله و بن

ماوی کوکارله جابجا اوپوشن  
متفکر طوروشلی قبه‌ارک  
زیر سقفنده تیت‌دین ارواح  
وعشه‌دار سمومی در کدرک ،

بر مصیبت‌در اهل اسلامه ،  
- بر مصیبت که خارق‌الاده -  
باشیورکن‌ده .. جان ویررکن‌ده  
آغلارم سرنوشت بغداده .

چهره‌سندن اوچان یتیمیت  
افقنه اولمامشمی حزن آوز ؟ ..  
ینه بیلیم کوزلی در اوقدار ؟ ..  
او مکوک ، او محشم کیجه‌لر ! ..



## فراق عراق

ای عراقك مليكه نازی ،  
قاله جق سهق جهانده بزسنمز ،  
یریوزنده دكل بو عمر ذلیل ،  
آخرنده جنانی ایسته میز ! . .

اوسنك افق تار مار كده  
هیچقران روحزد ای بغداد ،  
عین آغوش ایچنده برل كده  
كچن اعصاری ایتك ایستریاد :

یداهالمزده درت یوز بیل  
قانادك ، كیزلی بر جریحه کی .  
بیلمدك بز سنكده قیمتیکی :  
دردملمزك بودر سببی ! . .

دشمنك زیر پای قهرنده  
چیربنیركن اوبلدۀ خلفا ،  
سویله ای دجاله ، ای مبارك نهر ،  
شوخی ولاقید آقار میسك حالا ؟ .

کچمه لاقید او کندن ای دجله ،  
حرمت ایت ماتم معظمنه ، [۰]  
او تغافلدن اینجیر بلکه  
منکسر قلب کریه باری ینه ! ..

کچمه بی حس . . . بو کیسه سز قومک  
انقلاب ایت سرشک حسرتنه ،  
جانینکده یوکسلن شهرک  
یوز سوررکن جدار عصمتنه

دی که : - ای مفخر صهای عراق ،  
ینه اسلام ایلنده ماتم وار ،  
یولونور ، دسته دسته ، هریده  
قرد بختک کبی سیاه صاچلر ؛

دی که : - صحرالرکده ای بغداد ،  
سورولرله کزرسه جیلانلر ،

---

[۰] اصلی ( . مززینه ) ایدی . فقط بن قاضیه ده کی ضعیف نظر  
دقته آلمایه رق ( معظمنه ) دیدم .

## فراق عراق

بریدہ ماتمکھ کر یہ نثار ،  
 بچہ جیلان باقیلی کوزل وار ! ..

دجلہ ، بغدادہ نیلر سویلہ ،  
 او سنک طفل شیرخوار کدر ،  
 بونی تاریخہ صوز ، اونوتدکسہ ؛  
 ابدی دار افتخار کدر .

عین افق وطنده طوغدق بز ،  
 بشیکم منبعکھ قاردشدی . . .  
 - اورالردزده کچدی سیل بلا ،  
 اوده بیلمم نه حالده در شیمدی ؟ .. -

بر ایکن منبعکھ منصبک ،  
 بشقه کردابه انصباب ایتدک ؛  
 بوو فسز لنگکھ وابہ نری  
 منفعل ، مضطرب ، خراب ایتدک ! ..

یا تاغ کده یابانچی یوقکن ہیچ  
 - هر دوشوندکھ صیزلیور جکرم -



## دجله وین

ویردک اغیاره اک کوزل یریکی ،  
سکا ای دجله ، شیمدی مغبرم ! . .

بیلیرم ، صوص ، بزمده جرمنزی ! . .  
بلکه سندن داها کهنکارز ،  
اونی اہمال ایدوبده درت یوز ییل .  
شیمدی برہشقه مشتکا آراز .

یاتیور چولارنده یوز بیک کمنج ...  
- هپسی بغدادہ اولدیلر قربان -  
اونلرک خون حاری اولمازمی ؟  
جان یاقان بروسیلہ غفران ! . .

نشانی ، ۶ مارت ۱۹۱۷

## یار نام

نه اوچهره کده آن بآن قاراران ؟ ..  
بی قورقوتدی کوردیکک رؤیا ! ..  
او قراکلی ، ئولوملی اویقو کدن ،  
سویله بغداد ، اویانمادکی داها ؟ ..

افق آغارمش ، کونش طوغار ، بلکه  
ینه هریر شکوفه زاره دونر ؛  
بو حظوظات ایچنده آقشامکی  
الم مشتعل ده بلکه سونر ! ..

بن امینم ، بومانی فرقت  
یکه جکدر ... ینه ( بهشت آباد )  
اوله جقسک .. امینم ... آه فقط ! ..  
یار واغیار اوکنده ای بغداد ؛

خضم آمله ، دشمن حسه  
چکنتوب طورما خرماقلریکی ،  
عضلاتک تقاص ایلسه ،  
طویاسهم کیزلی هیچقریقاربکی .

سنی ئولش .... و بسبتون ئولش  
صانهرق منکسر ، خراب اولورم ؛  
بزی ده ئولدرر دکر بر ئولش ،  
یعنی سندن وؤبدآ محروم

یشامق ، الک فجیبع ئولوملردن  
داها دهشتلی بر مصیبت اولور .  
ایسته م بن اله اکبردن  
بویله بر عمر قاهر و مقهور ! ...

( بن امینم ! . . . ) دیشدم ، آه فقط !  
امضاً آیلر کچرده هپ محوم ،  
قالیرم بر طرفده بی طاقت . . .  
سنی کوردکجه بویله قورقیورم ! . .



## فراق عراق

( اويا نيرسك ! . . . ) ديدم ، فقط هيها ! . .

قمرى محشر قدر درين ازيقو ،

چيرينير چپه دسنده ظل ممت ،

صانكه همشيره اجلدر بو ! . .

ينه كوردم بو شب سايماني ،

— واردى ماتم نشاني تاجنده ،

تيتريوردى اريكه شاني

وطنك پيش اختلاجنده —

ديدم :

— اى فاتح كزين عراق ،

— اى ، فضولى قصيده سازى اولان ! . . . —

كچه جكمي بودورجور فراق ؟ . .

يوقسه ، سن سويله ، اى بيوك سلطان ،

ابديمي بو حال هول انكيز ،

بو تزلزل ، بو ياس و اضمحلال ؟ . .

محتجب عار ايچنده ماضيمز ،

محتفي قورقوسندن استقبال ! ! ! . .

۶ مارت ۱۹۱۷

دیار فضولی





## دیار فضولی

کاربان راه تجریدز خطر خوفن چکوب  
کام مجنون گاه بن دورایله نوبت بکارز.  
فضولی بغدادی

بوکون، فضولی ، مصائبناه اولان تربكه ،  
غموم ایچنده ، امینم که ، آغلیور بز سر ؛  
او بینوای فراقرکه مسکن ومدفن  
وطنده اولسه غریبز ... یتیم تاریخز ..!

کورشمدم سده اصلا مزارزارکله ،  
روان پاککی کوردم ، کزردی هریرده ؛  
أوت فضولی ، سنک روح ناله کارکله  
زمان زمان طولاشیردم او اؤکسوز ایللرده ..!

سنگله بن طولاشیرکن کورر و آغلاردم  
او منکسر وطنک حشر اولان سفالتی ؛  
سکوت ایدردی ثولورکن ده اویله آکلاردم  
که خوف عار ایله کیزلردی هر مذلتی .

محاسننده نمایان ملال خسروانی ،  
کلیندی صانکه ، او بر کریه زار هجرانده ؛  
جهانه عمر آقیدیرکن زاواللی پستانی  
قانار طورردی ملوث دهان کفرانده ..!!!

۱۸ نیسان ۱۹۱۷

## فضولی بغدادیدن نفعی\* ارضرومی به

بر تزلزلی ، صانکه بر محشر ،  
صوردم افلاکه ، خائف و مغموم ،  
— ارضرومك سقوطی در ! . .  
دیدیلر .

ابدیتده بی حضور اولدم .

او اوان غموم و حیرتده  
سنی آکدم ، دوشوندم ، آغلایه رق ،  
بن اولورکن بوغمله نالنده ،  
تتریوردی سیمده قلب عراق .

قهرمان ارضرومك اولادی ،  
جانلی بر قلمه سیدی اسلامك ؛  
قاله جقدر وؤبدآ یادی ،  
صفحه خاخرنده ایتمك .

فضولی بغدادیدن نفعی ارضرومی به

قادرین ، ارکک ، چولوق ، چوجوق ، نه قادر  
حق یوانده شهیدی وار بوراده :  
برمعظم حظیره در طاغیر ،  
قالدی بر اردو هر خراب اوواده ! . .

نفعی . ای بنم روحمن متولد نجیب اوغلم ! . .  
بن شمدی سنکله برازحسب حال ایتک ایسترم . اولاً ،  
سنک بورایه . . . بو ابدیلر عالمه فصل کلدیکی حکایه  
ایدهیم :

قرآنه ایمان ایدن شاعرلر ، حسان بن ثابتک اطرافنه  
طوپلانمشار ، هرکس کندی لسانیه صلاح الدین ایوبی به ،  
محمود غزنوی به ، یاوز سلطان سلیمه قصیده لر انشاد  
ایدیوردی . کعب بن زهیر بردن بره تترددی .

بانت سعاد فقای الیوم متبول  
قصیده نی حضورنبویده او قورکن کورولن هیجانی  
ینه او یانمشدی . دیدی که :

— او بر دنیا ده اوستنده دمکندار اولدیغم ییلدیز ،  
بن بورایه کلدکمن صوکره کندی کونشنک اطرافنده بیک  
دفعه دن زیاده دور ایتدی ، بونکله برابر ، ترتیل قرآن



## فراق عراق

ایدن شاعرلردن هانکیسنه فوق العاده بر حال اولورسه  
بن بوراده تتره ، صارصیلیر ، مضطرب و معذب اولورم.  
پیغمبرمک بکا پرده شریفه سی احسان ایدرکن تبشیرایتدیکی  
نعم ابدیه نی حالا کورمدم .

کعب بن زهیره حسان بن ثابت جواب ویردی ،  
— بنده سنک کی بم عزیز قاردم ، دیدی . سلاله  
معنویه مزدن ریوزنده بر فرد قالنجیه و او فرد صوک مصراعنی  
سویلنجیه قدر بز حضور سرمدیدن نصیب موعودی  
آله میه جغز .

حسان بن ثابته توجهله کعب بن زهیر سوزنده دوام ایتدی ،  
— فقط بوسفر کی حالتی هیج بر زمان حس ایتدم ، دیدی .  
شاعر نائب ابوطیب المتنبی اشقیا النده پاره لانیرکن بیله ،  
بن نو قدر صارصلما مدم . آفاق فزادن آتیلان سهام حادثاتک  
بودقیقه ده عجباً هانکیسنه هدف اولیورز ؟ ..

اوصرده سن بردن بره کوروندک ای نفی ! ..  
لرزان و نالان ، ایکی آلاک قانلی باشکی هوایه طوغری  
طوتمش ، درگاه عزتی آرابوردک .  
عجم شاعرلری انوری ایله عرفی ،

فضولی بغدادیدن نفعی ارضرومی به

— آه ! .. او... بزم عثمانی جمعیتنه هدیه ایتدیکمز  
بیوک شاعر نفعی ! ... عثمانی پادشاهلرینک مناقب غزواتی  
ترتم ایدن صراعلری یر یوزندن عکس ایدرکن بزروحلر،  
رقصان اولوردق .

دیدیلر .

ابدیلره بیوک بر کدر مستولی اولدی .

بوسکونسرای لم یزله  
قان واقغان ایچنده کلدک سن ؛  
خوف وحدتله ، غیظ وخشیتله  
مشتکیدک مراد رابعدن .

طوغریلوب بارگاه مولایه ،  
دیدک :

— ای رب عدل و ربّ عباد ،

سکا کلدم غریب و بیوايه  
خی قویدی بوحاله قبر مراد ! ..

سکا کلدم شهید و آواره ؛  
سویله ای رب منزل القرآن ،  
سویله سن ، یازدیم قصیده لره  
یاقتیرمیدی بویله بر حسان ؟ ...

بوسوزلك عالم ارواحده برغافله ، بر فریاد قوبارتدی ای  
 نفی ! .. قرآنه ایمان ایدن هر شاعر سنك کی وسنكله برابر ،  
 مراد رابعدن سنك خون معصومکی دعوی ایدیوردی .  
 بوراده کیجه یوق ، کوندوز یوق . آرادن نه قدر  
 زمان کچدی بیاحم . سنی بارگاه مولایه متوجه ، دعا ایدر  
 برحاله کورده . بز دعائی یالکیز فانیلردن بکلرکن سنك  
 بو حالک همزی اعجاب ایدیوردی . سوزلریکی دقتله ...  
 جان و ایمان قولاغیله دیکلهدم . سن ، وجد واستغراق  
 ایچنده ، کند کدن کچمش ،

— الهی ! .. مراد رابعدن راضی اول . واوئی لطف  
 و کر مکه ارضایت . دیوردک . بنم قائم اوکا بیک کره  
 حلال اولسون . او ، اکر بنی تولدیر مکه آثم ایسه ،  
 ایشنه نمه اعمام ، اوکناهی بنم حسابمه قیدایت . بن اکر  
 بغیر حق اعدام ایدلمش اولقله ثوابه کیرمش سههم ، بو ثوابی  
 سن اونك دفتر اعمالنه کچیر یاربی ! ..

بنی عفو ایت ... او یالانچی دنیانك کندی کی یالانچی  
 تاثرلرینه قابیلهرقی ، بر زمان اوندن سکا شکایت ایتشدم .  
 کناه و جرمی عفو ایت الهی ! ...

سن بویه سویلیوردك نفی ! . حالکده کی بو تحوله بن  
بهت عظیم ایله حیرت ایتدم . اودقیقه ده کی شوق و شکرانک  
سببی ، سن ، ینه کندی توصیفکله .

هم دونر ، هم اشکنی ایلر صفا سندن روان

طورنده ابدیلره آکلادیرکن دییوردك که :

— سلطان مراد رابع ، او بزم یوک پادشاهم ، بغدادی  
نهایت استرداد ایتدی . باقکمز ، ایشته امام اعظمک  
تر به سنی طواف ایله اسلامه نصرت دیلیور . شیخ الاسلام  
شاعر یحیی افندی ده پادشاهک آرقه سنده ، خشوع تعظیم  
ایله آل باغلامش ، کوزلرندن مبارک چهره سیله آق صقالنه  
( قطیف ) ک ایخیلرندن داها کوزل یاشلر دو کولیور ،  
باقکمز ، ایشته دجله ، ایشته فرات ! .. عراقک بوایکی  
دیدۀ حیاتی ده شمدی شوق ایله ، شکران ایله آغلیور .  
یتیم عراق ، یتیم بغداد ، آب ازلیسنه قاوشدی . کاشکی  
بیک جانم داها اولایدی ده پادشاهمک جلادی النده و تختی  
اوکنده روان اولایدی ! .. اووقت بن بورایه شاکی  
دکل ، شاکر ، لرزان دکل ، رقصان کلیردم ! ..  
آه ای نفی ! .. بو خطبه ک همیزی وجده کتیردی .

## فراق عراق

وهرطرفدن برغلغه شکران ، بر ولوله دعا یوکسیدی .  
بکلدیکنز قیامت بشقه بر صورتده و بشقه حالتده قویشدی .  
قرآنه ایمان ایدن شاعرلر ، حسان بن ثابتی امام ایدرک ،  
بارکاه اعلایه یوز طوتدیلر ، ودعالرینه وعد قبول آلنجیه  
قدر سلطان مراد رابع ایچون المهدن کوز یاشلریله عفو  
وغفران نیاز ایتدیلر .

شمدی ای شاعر ! .. سن ده ، بن ده ، - سنک و بنم  
کبی بر جوق اهل ایمانده - یتیمز .. یتیم دار ، یتیم دیار ،  
یتیم تاریخز . بنم بغدادده سنک ارضرومک کبی ، اعدای  
دین آئنده ایکلیور .

دجله به باق : طالغولرندن ،

روان پاک محمد سماده کریاندر  
مخلداتنی اسلامک ایتدیلر تحریف  
امام اعظمک آفاق اجماندده  
ایدر مجادله ناقوس ایله اذان شریف ! ..

نوحه لری نورالره قدر عکس انداز ! ..

الله اکبر ! ..

فراقی دیککه : موجه لرنندن ،



فضولی بغدادیدن نفعی از ضروی به

سرمباركك ای قرّه دو چشم رسول ،  
شهادت کده سنك تن جدا اولوب کیتدی ؛  
بو کونده - طانع اسلامه باق که - مشهدیکی  
ویروب عدویه یتیم وطن جدا ایتدی ! !

تاله لری بورالده بیله ولوله ساز ! ..

الله اکبر ! ...

ای نفعی ، ای بنم روحدن متولد اوغلم ! . بز شمدی  
هرایکیمز ، همطالع و همدردز .

سنکله برابر ، کل ، سلطان مراد رابك حضور مبارکته  
یوزلر سورمه . او حیتی پادشاه بزه هم دلیل اولسون ، هم شافع .  
خایفه بالحق اسلامك لواي حاکمیتی سنك ارضرومکه بنم  
بغدادمک برجلی اوستمده غالبیله تموج ایده جکی گونه قدر  
بزه ترتب ایدن وظیفه آغلامق ویالوارمقدر ، بز بو وظیفه بی  
ایفا ایدرکن سجده لر منزله عرش اعلی قره سون ! ..

ذی القعدة ۱۳۳۵

بصره یازلو

## بصره یه بر نیاز

عصر لرجه سنی پامال ائمهال ایتدك ای بصره ،  
- عذاب یادی هر کون چیرینر وجدان امتده -

بزی دین مینه حرمة عفوکه توبیخ ایت ،  
سن ای اسلام بی آرامك ایلک شهری اولان بلده ! ..

۲۵ مایس ۱۹۱۷

کوفه ایله بصره شهرلی اسلامك ایلک اثر اعماریدر.

بڼه اومه هجوره يه

هميچ ايدرمي ، سويله ، پريشان خيالكي ،  
هرماه افقلركدم طوغاركن هلال نو ؟ . .

نجم وهلالی یاد ایدەرك اشك وآه ايله  
عمانلرك كنارينه دوشمش غربي سو .

۲۵ مایس ۱۹۱۷





## محب اديبم احمد رامم بکه

سزبوکون يازی يازانلرمزك بيوک برادری ، آغا بکسکز .  
بالقان حربنده شهید اولان اوغسکیزك سزه دوکديرديکی کوز  
ياشلرني بيله دولت و ملت امتان اولماق ایچون کتم ايتديکیز .  
يالکیز بر کره ، سواقده کوردیکیز خسته نفرک هانکی آلايه  
منسوب اولديغی اوکرنديکیز زمان ( آم بزمکي نك آلاي ! )  
تلهی ضبط ايديله مين قيصه برهیچقراق کبی قلمکزدن چيقمشدی ،  
( شهيدك باباسی ) عنوانیه یازديغم شو حکایه يی نام استادانه کزه  
انحاف ایتمه لطفاً مساعده بیوزیکیز . سزی او بابالردن واک  
دکرایلردن بری اولق حیثیتیه باکال احترام سلاملارم عزیز  
آرقداشم و برادرم .

س . ن

## شېبدك باباسى

مجلس ماليه اءضالغندن متقاعد پدىرى اوتوز بىش سنه  
اول وفات ايتىشىدى . اوزمان كىندىسى يكرمى بىر ياشىنىدى ،  
مكتب ملكيۋ شىھانەنك صوك صنف امتحانلىرىنى احضار  
ايله مشغول ايدى . باباسنك ارتخالىدىن ايكى آى صوكرە  
على الاعلى درجەدە شىھادىنامە وغالباً آلتى بوزغروش معاش  
ايله بر نظارتە مأمور اولدى .

باباسى اوكا جراح پاشادە دكترە ناظر ، كوزل بر خانە  
ايله امين اوكنىدى اوچ دكان وغلطەدە كچوك بر خان مىراث  
براقىشىدى . شوبرقاج پارچە ملكك ايرادى ، اوزمانلىر  
تأمين رفاه ايتىمكە كافى ايدى . بونىكلە برابر طشرەلردە  
چالشمق ايتىيەرك ، بر قاج سنە صوكرە ، بولندىنى قلمى  
ترك ايله ، برولايتك معيت مأمورىيتى استىدا ايتىدى . املى .  
آناطولى نى ، آنا وطنى طولاشەرق هم خدمت ايتىك ،

هم مأموریت معاشندن تصرف ایدہ جکی بارہ ایله آطہ لرك  
برندہ برکوشک یابدیرہ رق، عمرینك صوك سنہ لری نظریف  
برباغچه ایله زنکین برکتبخانه اورتہ سنده کچیرمکدی .

دنیا دہ یالکز بروالده سی و افراد عائله نامندہ کنديسی  
بیوتمش اولان بردادیسی واردی که والدہ سنك جہازخالی  
ایکن اسکیدکچہ دوستی ، ہمدی ، ہمدردی اولمشدی .

او ، کچوک عائله سنی مستصحباً محل مأموریتنہ عزیمتہ  
حاضر لایرکن ، محلہ سنده ، کنج مأموری برقچ کون  
دوشوندرن کوچک برحادثہ اولدی : اولرینہ متصل اخشاب  
خانہ یه یکی بر عائله نقل ایتمشدی . کنج برقیزک آرہ صیرہ ،  
بروزسز، تترک برصدا ایله او قودینی ،

نہانسک دیدہ دن ای مست نازم ،

بکا سن سز جہانده جان نہ لازم ! ..

بم سنسک فلکده سایہ سازم ،

بکا سن سز جہانده جان نہ لازم ! ..

مصر اعلیٰ لیلہ باش لایان بر شرقی کنیدی خانہ سنسک

جونباسندن تأثر واستغراق ایله دیکلردی . اوزمانی ادراک

ایدنلر ، بوشرقی نی مطلقاً تخطر ایدرلر . ہر یردہ همان



هر کون او قونور ، بسته سی ده کفته سی کبی مرغوب بر  
نشیده ایدی .

او ، یوزخی کورمدیکی قیزه محرق سسنگ دلالتیه  
کندی یادنده ترسیم ایتدیکی برچهره ، مثلا ایری وایغین  
آلا کوزلر ، اوزون کیریکلر ، بیاض و آز طونبول بر  
یوز ، برقمی آلنک اوستنه دوکوش قرال و کورصاچلر  
اعاره ادر و اوقودینی شرقی بی دیکار ، دیکلردی .

بو آنجق برقاچ کون دوام ایده بیلدی . شو بیکناه  
حادثه استنا اولنورسه حیاتنک صحائف گذارشنه هیچ  
برماجرای معاشقه نك سطر تعذیبی قارشماشدر .

اشیاسنک لزوملی اقسامنی وایکی صندوقی طولدوران  
کتابلرینی آلهرق ، والده سسیله دادینی و برده اون بش  
سینه دنبیری خدمتلرنده بولان کنغربنی آشیجی قادینی  
بالاستصحاب ، برنجشنبه کونی آق دکنر طریقله سم  
مقصوده روان اولدی . بئندیکی واپور . کندی خانلری  
حذاسندن کچرکن ، برربع عصراق حیاتنک الک جانلی  
خاطرملری فارمه قاریشیق صورتده خیالندن گذران  
اولیوردی . بوسیره ده ، پروزمیز ، مهتر برصدا قولاغنه ،

نهانك ديدودن ای مست نازم ! ..

مصراعنی فیصدار کی اولدی . بوتخظر اونى پك  
زیاده متحسس ایتشدی . کوزلرنده یاشارمق استعدادنی  
حسن ایدرک قارمسنه چکلدی . و برداها اونى دوشونمك  
ایسته مدی . محل مأموریده واصل اولدقلری زمان شرقی ده ،  
خواننده نامرئی ده همان بستیون اونوتشدی .

او ، طشره حیاتنك فیکره تنبلك و او یوشوقاق ویرن  
اعتیاداتنه قاپلایه رق ، برابرچه مردمکریزانه یاشادی .  
استانبولك مطبوعاتیله پك آبی واقف اولدینی فرانسه  
جهنك انافس آثارنی اهتمام ایله تعقیب ایدیوردی .  
اوقدرکه سکیز سنه افتراقدن صوکره ایلک دفعه اوله رق  
صله رحم ایچون استانبوله کلدیکی زمان ، آرقادشلی  
ترقیات فکریه سنی براز حیرت ، برازده حجاب ایله تقدیر  
ایتملردی .

علوم مثبتنه نك تلقیناتندن بشقه هیچ برشیئه اهمیت  
ویرمین واعتماداتین اومتین ذکاتك . ارث واعتیاد سائقه سیله .  
بعض اباطیله قارشى ضعفی حسن اولنوردی . مثلاً سنه نك  
بعض آیلرینی ، آیلرک بعضی کونلرینی مشغول تاقی ایدر .

چغت صابیرلرک تڭ عددلردن زیاده برکتلی اولدیغنه ایناتمق  
ایستر ، هر آیک اینک دفعه اوله رق کوردیکی هاللی عقبنده  
ایک نظرینک تملق ایده جکی چهره دن یمن ونحس کله بیله  
جکهنه قائل وهله روایه عادتا معتقد ایدی . بو حالیه چوق  
دفعه لر کندیمی ده استهزا ایتش و ،

— نه یاپیم ؟ . . ائده دکل که ! .. بونلر بنم اعصابمک

عقیده لریدر .

دیمشدی .

موقت تحقیقات مأموریتلری ، قئم مقام اقلر ، متصرر-  
فلقلرله آناتولی نی ، عربلر ، کردلرله مسکون ولایتلری  
تام یکریمی سکیز سنه طولاشدی . میاه جاریه نیک مناظر  
حیاتندن محروم و آغاجسز چول قصبه لری ، بوغازلره ،  
اوچوروملره ، اورمانلره کومولش طاغ بلده لری ، هوا سی  
حید و یاصیتمه لی کونا کون یرلر ، ایشه یکریمی بش یاشندن  
المی اویج یاشنه قدر کچن سنه لری بلع ایدن مقابر احیا .  
اوبونلرک ایجاب ایتدیک قسوتی عنزم و اراده سنک قوتیه  
یکمشدی . عمرینک صوک دملرخی تسایه و ترفیه ایده جک  
کوشک ، استانبول آطه لرینک برنده ملاذ حیاتی اوله جق

يووا ، اوکا تشجيع خياليه محيطنك هر دم از عاجنده اعارة  
قوت ايدردی . يکرمی سکيز سینه ظرفنده يالکيز درت  
کره استانبوله مأذوناً کله رک بو اوزون مدتک آنجق  
سکيز آني مسقط رأسنده کچيره بيلمشدی .

عفت واستقامت خصوصنده متعصب ، عادتا تيتيزدی .  
واسرافى سومديکي کي . خستندده متفر ایدی . اون  
آلتيجي سنه استخدا نمده متصرفاني احراز ايتدکدر صوکره ،  
معاشنک نصفيه استانبولده کي وارداتنک تامني متظماً تصرف  
ايتدی . اوچ بيک کسور غروش موش ايله بالاستدعا تقاءند  
ايدلديکي زمان ، بش بيکي مقدمکي مأموريتلر ماشنک تصرف  
ايديلان مقدارندن اولق اوزره ، اون ايکي بيک کسور ليرا  
بانقهده باردسي موجود ایدی . نو مبلغ ، اوزمان هر امل  
موصومی تطمينه بالغا مبالغ کفایت ايدردی .

طشربه چيققدن بر سنه صوکره بولنديني ولايت  
دفتردارينک کریمه سيله تأهل ايتدی . کنديسي کي استانبوللی ،  
غایت کوزل ، اعتنا ايله تربيه وتعليم ايدلمش بر خام ؛ که  
آرالر نده آنجق سکيز ياش قدر بر فرق واردی . اولنديلر .

## فراق عراق

و سوشدیلر . تاهلارندن ایکی سنه صوکره ، چول اورتسه سنه  
 دو شمش بر قضا مرکزینک قیزغین کوتشی آلتنده صاغلام  
 کوزل برارکک چوجوقلری دنیا یه کدی سده زاوللی کنج  
 قادین . والده لکک نعمت و ذوقنی درت کون قدرادرک ایدرک  
 حمای نفاسیدن وضع حملک اونتی کونی ترک حیات ایتدی ! ..  
 بو ضربه یکی پدر اولان زوجی فنا حالده صار صمشدی .  
 اوغانه قارشى والدلک وظائفدن حصه یاب اولیور ، کندى  
 والد سیه دادیسنک نوزاده بدل ایتدکلری اهتمام اوده اشتراک  
 ایدیوردی . شفقت ابوتی برقات داها تشدید ایدن بو  
 فضله و مجبوری اشتغال و تقید . اونى اولادینه دیکر بابالردن  
 زیاده ربط ایتشدی . چوجوق بو بودکجه بو مربوطیت  
 تراید ایتدی سنه لر هپ بویه کچمش ؛ تقاعدنی استحصال  
 ایله قنهلر آطهده ، داها اول انشا ایتدیرمش اولدیغی ،  
 گوشکه یرلشدیکی زمان ، یکر می بش یاشنده کی اوغلی باباسنک  
 منور ، ذکی ، عز مکار بر مستشاری ، بر محرمی ، اک یاقین  
 آرقاداشی اولمشدی .

دو قورا امتحانلری ویرمش ، اوسنه مکتب حقوقدن



نئىت ايدە چكدى ، حرب عمومى يە غاىد سىز بىرلىك اعلان  
اولدى . وكنچ حقوق شناس دە آرقادىلار يە برابر  
دعوت اولدىقلىرى سالاخ آلتىنە شتاب ايتدى .

بىن انى بوسىرا دە ، قىزىلى آتەسىنى تىزىن ايدىن ،  
هر درلو اسباب رفاهى محتوى ، كوشكندە كى خىرلىق باغچە سىلە  
زىنكىن كىتبخانە سىنك آراسىندە ، براز مىزويانە و فوق العادە  
كبارانە عمر كىچىر ركن خانىدەم . و آز زمان اچىندە مەنابلا  
سوشىك ، استانبولە ئادرا كلىر وەر كىلدكچە بىي بىمە حال  
آزاردى .

اوغلىك عىسكىرلىكىنى مەنوك بىر تەسەللە تاپقى ايتدى .  
حقوق شناس انى بىر نىقىر و ايكى اوچ آلىق بىر تەلىمىدن  
صوكرە مەكمل بىر عىسكىر اولمشىدى . احتياط ضابطىكىلە  
عراق جەمەسىنە مأمور ايتدىلار . اورادىن باباسىنە يازدىنى  
مەكتوبلار بىك حرارتلى ، دىن عشقى ، وطن مەحبەتلىلە  
مالى ايدى . براز صوكرە خىر آلدق كە ( شەيخە ) او كندە  
صاغ مەسەنك اوستىدىن بىر مېترالىوز قورشونىلە ياردەملىش  
وتداوى ايجون بىغداده قىدر كىتىر مىشلار .

بىغداده عىسكىرى خىستە خانە سىندە اللى كون ياتىد قىدن صوكرە

## فراق عراق

اوچ آی تبدیل هوا ایله استانبوله کادی. نهقدار دکشمش:

نهقدار صارارمش ونهقدار ضعیفلامشدی!!

زیارتلرینه کیتدم. باباسی اوغلی تکرار کوردیکی

ایچونممنون، فقط جسمنک مواجهه خرایسندہ اندیشه ناک

و متألّم ایدی. تبدیلهوا مدتی بیتشمی ایدی بیلمم،

غالیچیا سفری ایچون مرتب فرقه لردن برینه مأمور ایتشلر.

بابا، اوغل هییچ برکته شکایت تعاطی ایتمکسزین، برقاج

ظمه کوز یاشیله ایصلانان بوسه لر آراسندہ آیرلدیلر.

غالیچیان ایکیشر هفته فاصله و قیرقر کون ناخرله

اوچ مکتوب کادی.

بوکغدلر بریحق سنه اولکی توانا، جدالو ضابطک

حرارتلی خطابه لرینی دکل، اعصابی کوشه مش، مفتور

برآدامک یورغون حسبحال لرینی محتوی ایدی. صوک

مکتوبندہ باباسنه دیوردی که:

بوکیجه رؤیامده جدیکیزی کورددم. نهقدر سویملی

برآدامدی!! بنی یوزمدن، کوزومدن اوپه رک حالمی وسزی

صوردی. ولادتکزدن چوق اول وفات ایتمش، سزی

بیلمیورمش. بکاده ( نهوقت یانمه کلهجکسک اوغلم؟ .. )

دیدى . بوسئال كاشكى فوق العاده برحاله اشارت ، بر بشارت اولسه ! .

زاواللى پدر ! . . بورۇياني حسن تعبير ایدیور ،  
— ئولو كورمك خیردر . دعوت ده داهایك چوق زمان  
دیاده قالدغه اشارت ! ..

دیـوردی . او بو مکتوبله عادتاً متسلى اولمق  
ایستمدی . فقط آرادن هفته لر ، آیله ر کچور ، اوغلندن  
خبر کچوردی . بو خالجانلی کونلرک برنده زیارتنه کیتمشم  
آرتق اولکی قدر اوقویه میور ، وباغچه سنك کونا کون  
چیچک لرله اسکیسی کبی اوغراشمتدن عاجز ، آچقده .  
تخته ویا حصیر قاپله راوستنده ساعت رج ، طالعین ، او بوشوق  
اوطور بیوردی . فکریخی بر مدت بشقه شیلرله اشغال  
ایتمک ایستمد . نهلردن محظوظ اوله جغنی بیلیوردم .  
صحبتمز اونى بولندیغنی حالدن یاواش یاواش آیره رق ،  
جانلاندىرمق استعدادینی کوستر بر طرز آلدیغنی زمان  
دمیر بارمقده باغچه نی سوقاقدن آیران دیوارک اوتسندن  
وقارشیکى قالدیرمدن ، بر باجانی کسيلمش ، جا کتک  
اوستنده قیرمزى و بیاض رنگلی شریدى اوزاقدن سیله  
فرق اولتاز . کبیج ، ایری ، یاقیشقلى بر ضابطایکی قولتوق

دکنکنه طبعش آهسته آهسته کیوردی . بونی کورر  
کورمن نه سویل بکنی اونوتدی . و بردن بره صاراره رق  
دود قبری تتره مکّه باشلادی .

— آمان یرتی! ... بئکی ده بویله می کله چک ؟ ..

دیدي .

ایکیمزده صوصمش ، ایکیمزده نه سوبایه جکیزی  
شایر مشدق . آرادن بش ، اون دقیقه کچی . سکوتی ینه  
کندیسی اخلاص ایله ،

— آه کلسون ده نصل کلیر . کلسون ! ... دیدي .  
اونی بن کلیر کلیم اولاندیرمه جکم . شو باغچه ناک  
اورته سنده ، چنلرک اوستنده چنلرینی چوپره رک قوشه جق  
طورونلرم بکا هرشیی اونوتدیررلر . قوشونلر ، اویناسونلر ،  
بالکیز چیچکلری قوبارماسونلر ، چونکه بونلری ده اوزون  
أمکله یتشدیردم .

بو سوزلری سویلدکن صوکره بر قاق دقیقه سکوت  
ایتمدی . بن اد کون کلش اولدیغمه نادم ، مضطرب  
دوشونیوردم . بردن بره آجی آجی کولمکه باشلادی .  
چهره سنده اوزمانه قدر هیج کورمدیکم بر حال ، کوزلرنده

وحشی برشعله واردی . نه یالان سسویلیم ! . قور قوردم ،  
وقاچق ایستدم .

خبرسز کچن هفته لر پدر قلبنك اندیشه لرینی دقیقه دن  
دقیقه یه آرتدیر یوردی . کونك برنده باغچه قیوسنك  
چنغراغنی احتراز ایله جالان بر پوسته فوزعی ، خدمتی  
قیزه صاغ گوشه سی مغالی رسمی بر ظرف اوزاتدی . ومقبوضنی  
صو کره کلوب آله جفنی سوبیه رک ، تجربه دیده مأمور . عادتاً  
فرار ایدر جه سنه ، اوزاقلاشدی .

کلن تحریرات ، حربیه نظارتندن ایدی . مخدومنك  
دشمندن بر سپر استرداد ایدر کن ، بلوکنك باشنده شهید  
اولدنی خبر ویریلور ، پدر محترمه هم تعزیه . هم کیمکاری  
غالیچیانك طو پراقلرینه قاریشمش اولان اجدادك ارواحنی  
قهر مانجه ئولومیه مفتخر ایدن بویه بر اوغل یتشدیرمش  
اولدیغندن طولای ، تبریک ایدیلدوردی .

هم تعزیه ، هم تبریک اولنان پدر ، بوسطرلری ایلاک  
اوقویشده هیچ بر شی آکلایه مادی . بر قاچ کره دها  
اوقودی . خایر ! .. اویوشمش وطو کش دماغی بوسطرله  
صوقولمش معمانی بر درلو حل ایده میوردی . افق ادرا کنی

قاپلایان سیحاب ابرام هنوز بستیون طاغلمه دن او طه سینه  
 چیه رق اوغلندن صوک کلن مکتوبی یازیخانه سنک اورتیه  
 کوزندن چیقاردی. و دقتله او قومغه قویولدی. فقط شمدی  
 کلن رسمی کاغذک محتویاتیه اوغلنک رؤیاسی آراسنده صریح  
 بر تناقض وار. مادام که جدی اوغلنه کورنمش و دعوت  
 ایتش، او بهمه حال خانه سینه سالماً عودت ایتلی ایدی.  
 ئولو کورمک خیره اشارت، دعوت ده دنیاده قالغه  
 بشارت! .. مکتوبی ده، تحریراتی ده بر ماصنه سنک اوستنه  
 آتهرق، جابجا کتاب دولابری موضوع کینش یازیخانه سنده،  
 والی آرقه سنده آغیر آدیم لرله طولاشمغه باشلادی.  
 کونش استانبولک افقندن غروب ایتش، قارشیده کی  
 آناطولی ساحلی قارارمغه یوز طوتمشدی. آرتق نه اوغلنی  
 دوشونوردی، نه آناطولینک یکریمی سکیز سنه سورن  
 یکنسق، ملال آلود، قسوتلی حیاتی. داهای اوله،  
 جراح پاشاده کی لاقید، معصوم، شن سنه لرله ارجاع  
 تخطر ایتدی.

حالك یأس و اضطراب ایله خیر پینان دقیقه لرنده



ماضىنىڭ الواح مەردەسنى تەماشايە طالمىق نەقدىر الم آوردر!..  
خوش كچن دىلەرمزە ( فلەكەدن چالغىش بركون) دىرز .  
فقط فلەك ، چالغىش ھەركونك بىلەننى وانىقامنى بىزدى  
مىضطرب ومقتور دوشىدىكىمىز دىقەلەردە - ھەمدە فائىزى  
واضعافىلە - آلېر . خالەك كرىوۋ واضطرارەندىن نەوقت  
خافىزەمىزەك جەل يادىنە صارىلەرق چىقمىق ايسىترەك  
داھا درىن بركرداب ضجرتە دوشىرز . انساندە فطرى  
بر داءالصلە ماضى واردر . اوتخىرى ، بىردە خالەك قەھرىلە  
مقتور اولدىغىمىز زمان ، تەيزىز وايىقاظ ايدىرسەك ، تاب  
تەلمىزى كەندى المزلە قىرغىش اولورز .

اى فائى ! .. ماضىدىن ، خصوصىيە ماضىنىڭ ، سىنىڭ  
حىياتىڭ وسىنىڭ سەادتىڭ كېي ، ناپايدار وبى وفا ايام اذواقى  
قرە كونلەردە ياد ايتىكەن قورق . كچەشەك تسلىت  
دىلنىدىكىڭ الى ، سىنى حساً ضعيف وخستە بولورسە ،  
موجودىتىڭى قىران بىرئىچە قاھى اولور ،

زاواللى بابا !.. اودىقەدە نە محاكەسەنە حاكىم ايدى ،  
نە اختيارىنە صاحب . نفسى ، كوزل كچەش كونلەك  
مستەزى ومەذب يادىنە ، پرفتور وبى ارادە . تسليم ايتىدى .

## فراق عراق

مرحومه والدهنى كىنجا كنده استانبولك الك كوزل  
قادينى ايمش . بواك كوزل قاديك انظار شفقتى او كنده  
قوشان ، اوينايان چوجقغنى ، صوكرده استقبال دورادوره  
عائد برغايه يى تظمين عزيميله استانبولى ترك ايتك ايتديكى  
زمانلرى دوشوندى . اوغلنك مکتوبلرى انقطاع ايتديكى  
هفته لردن برى آره صره كوزلرنده بليرن غريب شعله لردن  
برى بوسفرده پارلامغه باشلايوردى . بردن بره كوزلر يى  
طاوانه ديكرك برايكى دقيقه آراندى . دوداقلرى خفيف  
صورته تترىور ، بوغازندن بى معنى ، فقط نغمه لى بر  
ميرلى چيقيوردى . براز صوكره كور و آجى برسيله ،  
عادتا حايقيركى ، ترنم ايتديكى طويولدى :

نهانسك ديده دن اى مست نازم ،

بكا سن سز جهانده جان نه لازم ! .

بنم سنسك فلكنده سايه سازم ،

بكا سن سز جهانده جان نه لازم !

يتمش سكر ياشنده كى داديبى كچوك بكنك تام قرق  
سنه نبرى شرقى او قودىغنى ايشيتىلدى . اوحالا بو اختياره  
( كچوك بك ) ديردى . وكولنلرده ،

— نەياپەيم ؟ . . . ئالە طرغدى . بشىكنى ساللادىم . آق  
صقالى دە اولسە يەنە بىم كچوك بكمدر .

اعتذارىنى صاوورردى .

دادى سىس سىز ، سىس سىز ايلريليەرك يارى آچىق  
قالمش اولان اوپە قېوسىنك آرالغىدىن باقدى . يىكك اووقتە  
قدر ھىچ كورلماش برحالى واردى . كىرمكە وصورمغە  
جرأت ايدەمدى . بر آز صوكرا يىمكە ايتىسنى اخطار  
ايچون كوندردىكى خەتەجىي دە بك بر آل اشارتيلە  
صاودى .

شرقىسىنە يك قىصە فاصىلەلرلە دوام ايدىيوردى .  
صبح اولمشدى . كوشش آناطولنىك افقندىن طوغاركن  
اوعىن طور وادا ايلە شرقىسىنى اوقويور ، اوقويوردى :

دل وىرانى يىقدىك تىلدن ،  
يچىردىك كوكلى ھىر بر اىلدن ،  
رھاياب اولماك ظالم اجلەن ،  
بكا سىن سىزچەندە جان نەلازم ! . . .

كونشك اوپە يەدوكونلن اشەئە محرقەسى اوکا شرقىسىنى كسىدر .  
يردى . آرتق طولاشە جق قوتى دە قالمامشىدى . كوزى ، ماسەنك  
اوستىدە آچىق طوران او كفن صورتلى ايكي كاغدە ايلەشدى .

او کهنده توقف ایتش ، طوقونمغه عادتاً جسارت ایدمه‌موردی .  
 او یوقوسزلقندن ، آچاقدن بی تاب ، قیزارمش کوزلرنده معهود  
 شعله ، بردن بره هر زمانه‌کنندن داها شدتله پیدا اوله‌رق ،  
 اولاً اوغلنک مک‌توبی ، صوکرده‌حریه نظارت‌نک تحریراتی  
 او قودی . بونده آکلاش-یلمیه‌جق هیچ شی یوقدی .  
 دون آقشامدن بری انتقال ایدمه‌مامش اولدیغنه قهقهه‌لرله  
 حیرت ایتدی . مسئله‌ک صریح : اردو اوغلنی خدماتنه  
 مکافأة ترخیص ایتش . هیچ اوغلی ئولان بر بابا تبریک  
 اولنورمی ؟.. بو آنجق تهنیت ترخیصدر . اونزده ایسه ،  
 احتمال‌که بوکون ، بو صبح کندیسنه کله‌جک . آقشامدن  
 بری اندیشه‌ناک ، ساکت طوران دادیسنی چاغیردی :

— آرتق بزم چوجوق کلپور . اولاً ددهم تبشیر ایتدی .  
 شمیدی‌ده اردودن خبر ویریپورلر . بکا بر قهوه آلتی حاضرلا .  
 ایلك واپورله کلك احتمالی وار .  
 دیدی .

بو مژده ایله سوینین دادینک همان حاضرلادیفی قهوه  
 آلتی‌ی قیر صقاللی کچوک بکی یرکن ، جفاکش قالدین ،  
 هرایکی بکنی قاووشدیرجق اولان جناب‌اللهه شکر  
 ایدیوردی .

اميدوار پدر ايلك واپورى استقباله كيتدى . قنەلى يە  
يالكىز ايكي يولچى چىقمىشىدى سكوت ايله خانەسنە عودت  
اندەرك دېكر واپورە ... واپوردن واپورە نقل انتظار  
ايتىدى . واپور بولمادىغى ساعىتلەردە دورىين الئندە ، دكىزدن  
كچن قايقلىرى برر برر ترصد وكوزدن غائب اولنجە يە قدر  
تعقيب ايدردى . آھ .. نەقدار قايقلىك يولچىلىرىنى اوغلنە  
بىكز تمش ، يورەكى نەقدار تترەمىشى ..!

درت كون صوكرە ( صباح ) غزىتە سىندە باندەرمە  
استاسيوننە عائد بر تلغرافنامە او قودى . ظاهرە كىندىسە  
تەئىق ايتىن برايش . بونىكە برابر شوتلغرافنامەك اوغلىلە  
بر مناسبتى اولدىغى سەزدەك ايلك واپورلە باندەرمە يە كيتدى .  
اوغلى اورادەدە يوقدى ..!

آرتق مختلف يىلردن صىق صىق اوكا اوغلىك  
امضاسىلە تلغرافلر كلىور ، هركون براسكەدە ، بر دىمىر  
يول موقفەندە اونى آرايوردى . او بوخيال ايله نەقدار  
بىقرار اولمش ، نەقدار فېرطنەلى هوالك ، ياغمورلو .  
صوغوق كونلر كى مەالكىنى ، بازىچە امواج اولان كچوك .  
طار ، پىس بر واپورە ، بعضاً بر معونەدە ، بر قايقەدە

## فراق عراق

ساكت و صبور آتلا تمشدى!.. سيلو ريدين اردكه، كايوليدن  
مكليكهدر مر مردنك شرقنده، غربنده، جنوبنده، شمالنده  
نه قرار اسكه ونه قرار آطه وارسه هيسى برر برر ارادى.  
موهوم تلغرافنامه لك تىمادى ايدن يالانلرى اونى مايوس  
دكل، داهاه زياده اميدوار ايدىيوردى.

ظريف باغچه سى، طورونلرينك چنبرلرى چنبرلرى  
اوستنده دوئمەدن، چيچكلرى، آغاجلريله خراب اولمش،  
زنكين كتيخانه سى، نسيانك هرگون براز داهاه ماديلىشن  
طبقات متكافه سيله توزلر واورو بچكلر ايچنده، متروك  
برتر بهيه دوئمەدى.

كىمسه ي نه زيارت، نه قبول ايدىيوردى. آيلردن  
برى بچاره يي كور مامشدم. قونيه دن عودت ايدركن ايزميت  
استاسيوننده تصادف ايتدم. نه قرار دكشمش ونه قرار  
اختيار و خراب اولمشدى!.. اوغلندن ينه تلغراف آلمش،  
بزم ترنده ايمش. اولايو جيللىرى، صوكره قومبار تيمانلرى.  
اشيا واغونلارنى، لوقوموتيف عربە سنى برر برر ارادى.  
بك يورغوندى. اوغلنك بوسفرده چيقمايغنى كورونجه  
اوراده كي تحته قنابه نك اوستنه ييقيلر كي اوطوره رق،



شېدك باباسى

— آء! ئرمەدە قىلدى!.. بابا اولامش كە بو قدر انتظارك  
بربابايە نە قدر اذيت وىردىكىنى بىلسون!  
دىدى.

نشان طاشى ۈ ۸ اغستوس ۱۹۱۸

## سبحانك يا محول الاحوال ..!

آرادن بش عصر دگل ، الی بیک سنه کچمه ینسه  
 بوقدر سقوط ایده جکمزده احتمال وریلزدی . اوت ، توله  
 بر سقوط که حسیض دلتنده اسفل سافلین اعلا ی علین قلیر !  
 بوش عصرک بزده نه قدار تخریبات معنویه اجرا  
 ایندی کی تعیین ایچون بدقیقات عمیقیه احتیاج یوقدر .  
 تاریخنن یالکیز بر وقعیه یی بدمزده احیا واکا اتمک  
 کفایت ایدر :

تیمورلک سیواسی ضبط ایله بیلدیریم بایزیدک شهزاده سی  
 ارطغرلی شهید ایدرکن ، او بدبخت شهر ، بو طالعه سر  
 شهر یارک ممالک مفتوحه سی عدادینه یکی داخل اولمشدی .  
 بر بلده ، التحاق ایتش اولدینی ملکک حیات و مقدرات  
 عمومیه سنه در حال اشتراک ایده بیلیر سده ، مشارکت حسیه  
 بعلون عیدده نک آمیزش خاطراتیله وجود پذیر اولور .

ملك ايله مالك آراسنده كى روابط ضميمه ي تشيد  
 ايدم بيلدجك زمان كچه دن تيمورلنك سيواسه مستولى  
 اولدى . بمصيت مضاعفه بايزيد اوله نيلديرم كى اصابت  
 ايتمشدى . پايتختى اولان بروسه نك اطرافنده كونلرجه تنها  
 ومليل طولاشدى . بو كشت وكندار آراسنده قاول چالان  
 برچوبانه تصادف ايدر . ذاتاً مهيلى فوران اولان تاثراتنى  
 تهييجه بو پریشان نغمه لر كافى ايدى .

— چال چوبان چال ! ... نه سيواس كى شهر ك ييقيلدى ،  
 نه ارغفرل كى اوغلنك تولدى ! . . .

ديرك آغلامه باشلادى . بوتاريخى نوحه نك معنائى  
 مؤلنى هبيچ برمرثيه بو قدر رقتله افاده ائده مزر . زواالى  
 پادشاه وزواالى بابا ييقيلان شهريله تولى اوغلنك سز نوشت  
 سيامى او كنده عين حس تله قى احموا ايدن برشفقت نجيه  
 كو سترمشدى ! . .

فقط شيمدى بزه نه اولدى ؟ . . نه اولدى كه بلد لر دكل ،  
 شور لر كيدسيورده بزينه خودكام ، ينه مسكين برلاقيدى ايله  
 اونلر آجيمق ، خاير ، آجيمق شويله طورسون ، اونلر ك

## فراق عراق

ماتممه حرمة همر کونکی حظ و ذوقزه بر دقیقه سکوت  
امر ایتک ایسته میورز .

فرانسه آلساس - لورن ایچون قرق بش سینه ماتم  
طوتدی . ترك قانیله صولانمش ترك نهری اولان (طونه)  
ایچون بوکون قاچ دانه آغلایانمز وار . اولادینک عثمانلی  
حسله چاربان قابرلی ترك کوکسارینه بیله شرف و یردجک  
درجه ده صاف و متین اولان بصره ایچون ماتم طوتانلر من  
نرده ؟..

والیسندن اینیتمه : حکومت مز ارضرومی تخیه ایدرکن  
ارزاق وشیای رسمیه نی نقل ایدن عربلر ، اهالینک  
عسکره هده ایتدکلری ذخیره عربلریله شهرک قبوسی  
اوکنده قارشیلانمش . سرحد مزک درت یوز بوقدار  
سنه لک نکهبان فداکاری اولان ارضروم ایچون ...  
اسکی عثمانلی بادشاهلرینک منقب غزاسنی عصرلره تربم  
ایتدیرن نفعت وطفی ایچون آغلایان کوزلر من نرده ؟..  
فلاکتلر قارشیسنده حیات نثار اولمق قدار بیوک بر  
فضیلت واردرکه اوده مصائب عمومیه مواجهه سنده  
ماتمدار بولمقدیر . فقط بز ، حقندن وخلقندن حیا ایتمیرک ،

بصر.ك ماتمى وار شووانك بايراميله، ارضرومك المنى  
بكره شك شملكيله تلويث ايتدك.

بك اوغلى بوهم ايكرنج، هم مسخره مناسه. بتلردن  
بريله بركون اكثيركن، تراموايده برارضروملى به تصادف  
ايتدم. وطننك نجاتنه تماق ايدن فكري ثابى بيجاره به  
ارضرومك استرداد ايدلمش اولدينى ظنى ويرهش، خلجنانلى  
برسسه بندن صورتى كه :

— بوبراقلىر نجيون آصيلور ؟ . ارضرومى كرى  
آلدقى ؟..

جواب ويرهكده تردد ايتدم . حقيقى سويلمكله  
اونك اميد ماتمدارينه حرمتسزلك ايدم جكمندن قورقيوردم.  
بشقه بريولجى ( رومانيانك يابختى متفق اردولر جانبدن  
ضبط ايدلمش ) اولدينى تبشير ايله، ارضروملىنك قانايان  
قلبنه قاهر برمشه اطمشان اينديردى. بيجاره ارضروملى  
اميددن ياسه . وياسدن تهوره انتقال ايدرك مملكتنك  
قره خيالى اوكنده بو قرمىزى بوبراقلىرى سيم سياه كوردن  
برنظر غيظ ايله اطرافنه باقاركن يانندن آيرلدم.  
شمالدن جنوبه كچملم :

## فراق عراق

بر آزردہ اہل الملزك پامالی اولان بصرہ ددن کچن اسیر لر مزہ  
بصرہ لی ذکور ونسوانك کو ستر دیکی آثار شفقتی (طنین)  
غز تہ سمنده او قومایان و آغلامایان کیمسه قالمادی . [ ]

[\*] طنین غز تہ سنك ۲۱ محرم ۱۲۳۵ . ۱۸ تشرین ثانی  
۱۹۱۶ تاریخی نسخه می ، میادله اولنان ضعفای اسرا میاننده  
هندستاندن عودت ایدن عسکر لر مزدن بر ایکسیله غز تہ نك  
محوری آراسنده واقع اولان بر ملاقاتی تفصیلاً حاکی بر مقالہ بی  
مخویدر . شو بر قاچ سطری اورادن عیناً نقل ایدیورم :  
... امر چاوشی قیصہ بر توقفدن ضوکرہ ینہ سوزینہ  
دوام ایتدی .

### بصرہ دہ اسلام تظاہراتی

صبح ، ینہ کلیچہ لر بیدکر مزده اولدیغی حالده ایکیشر اولدق .  
ویورومکہ اقتدار ی اولان ، اولیمان ہیمن بصرہ یه طوغری  
ایلر یلیکک باشلادق . انکیزلر بو کون دیگر کونلردن فضله بر  
تقید کوستریورلردی . اسکی محافظلره رفاقت ایدن هندلی  
مسلمانلری غورغو وانکیز نفراتیله تبدیل ایتشلردی .

شهره داخل اولورکن مایوس فریادلر عکس ایتیمکک باشلادی .  
شهرک سواقلرندن کچرکن بر مسلمان محشری آراسنده بولند یغمزی  
صمیمی بر ممنونیتله کوریوردق . وهر آغایه رق باغیران ، جناب  
حقدن دین قاردشلیری ایچون نیاز مرحمت ایلوردی . اولرک  
طاملری اوزرینہ چقان مسلمانلر ، قادین ، ارکک ، انکیزلرک  
بتون شدت ممانعتلرینہ رغماً اوزد مزہ اکمک ، شکر ، سیغاره



او وفاكار خلق بزم بوقدار وفاسز اولديغمزى بيلم  
بيلورمى ؟ . . . شط العرب اولادى آراسنده .

— آنا وطنمك قلبكاي اولان پاختمز كيم بيلير شيمدى بزم  
ايچون نه قدر متألدر ؟ . . .

دينلر وارميدز ؟ . . . اوت وار ، ويمين ايدرم كه يك

چوق وار . هيسوده ايكي سنه لك يتيمك كنى كندى حس

محبتك بو اغفال معصوميله نسليله ايدىيور . فقط بز آلمان

اردوسنك « وار شوا » شريته كيرديكي كون قوبارديغمز

هاى وهوى شادى ايله بصردلنك قناعت صافيه سنه اوبله

براطمه تكذيب اينديرلك كه آجيسى عصرلر اونوتميه حق ،

واونوتدirmه حقدرد .

اى سيواس شهرى . . . بختيار اول واقفخار ايت كه

عزت نفسى يولنده خراب و تراب اولان برپادشاه كندى

اوغلنك ترابيله سنك خرابكه برلكده آغلادى

ياغدير يورلردى . قادينلر بوحوالى به مخصوص اولان ماتم هيچقير

يليله فرياد ايدىيور والرنده كي ييه جكارى بزه ، ائزه ويرمك

ايچون محافظلرك اوزرلرينه آتيدىيورلردى . بوسلا حسرت تاج كيتدجه

تزايد ايدىيوردى ، غورغورلر . غلبه لى طاغيتق ايچون اهالى يى

ديچكه مكه ، ايتكه اوغراشديلر . اسلاملر بوكا بسبون منفعل

اوله رق اسكيسندن دها شدنله . آلرنده كيلرينى اسير دينا شلرينه

ويرمك ايچون آتشلردى . . .

## فراق عراق

ای یوز سنه دهری متوالیا غائب ایتدی کمز ولایتلر .  
اولک کتر!.. سز بزی عفوایتسه کز بیله بز اللهک وتاریحک  
دشنامندن تخلیص نام وناموس ایدهمیه جکز .  
ای وطن ایچون جان ویرنلر!.. ای وطن یولنده عضولر  
فدا ایدنلر!.. ای وطنک سرحدلرنده وطور اقلرنده آندن  
وکیکدن سپرلر یابانلر! . . . وای بونلرک ماتمدار ویا  
اندیشه کارخویشانی!.. سز بو کتله خودکامک دایما فوقنده  
قالکتر .

نشانطاشی ۴ مارت ۱۹۱۷

## بر درد قدیمه راجع

یاد ضیاعی اسلامک حظیرة خاطر اتشدم بر طیف تحریر کبی دائما  
طولاشه جق و دائما آغلایه جق اولان ( اندلس ) ک ما جراسق  
ایلك ایشیتدیکم زمان هنوز اون یاشنه کیرماه شدم . تم قرق  
سنه در ، اسپانیایه غیظ و کیم وار . ( کوبا ) لیلرک اوزون سنه لر  
سورن عصیانیه آمریکا - اسپانیا محاربه سنک تحدث ایتک اوزرم  
بولدیفی بر زمانده و ( ماین ) زرهلینک غرق ایدلدیکی کورلرده  
شوم منظومه یی یازمشدم :

## کوبالیلر

— اندلس شهادتینه —

نادر بو ربقه کُردن شکن که هر پرده  
ایدر تحکم اعصاری دمبدم تجدید ؟ ..  
یچون بودیده ادراکی حبس ایدن پرده ،  
ضیای فیضی مستقبلک ایدر تهدید ؟ ..

ینقلدی اندلس ... ایواه اونو تماغ حالا ! ...  
— بکا کلیرکه اویزدن اومار بو کون امداد —  
دووه افقرینی بیک صدای واویلا ،  
کچن مظالمی ایلر خرابه لر تعداد ..

یناه ظلم وتغلب کسله ده دنیا ،  
بشر مسخرک اولماز ینه ای اسپانیا ،  
فلا کیتی ( کوبا ) نک جلب ایدر فلا کیتی ،

سنى خراب ايده جكدر بوياس عزم افزا .  
اكر اميد ايديورسهك بقاي شوكتكي ،  
بتون اميدلر ايتسون سنكه استهزا ! ..

بروسه ،



۸ نجی و ۱۸ نجی صحیفه لرده کی  
رسملر (فراق عراق) ایچون رسم  
نامق اسماعیل بک طرفندن صورت  
مخصوصه ده ابداع و اهدا اولمیشدر.





کتابده اسملى صراحةً وضمناً مسطور اولانلر :

- ابوالطيب المتنبى ( شاعر عرب ) ۲۳ .  
احمد راسم بك ( اديب عثمانى ) ۳۳ .  
ارطغرل ( شهزاده عثمانى ) ۵۴ ، ۵۵ ، ۵۹ .  
انورى ( شاعر عجم ) ۲۳ .  
بازيد ( سلطان ييلديرم ) ۵۴ ، ۵۵ ، ۵۹ .  
تحسين بك ( ارضروم واليسى ) ۵۶ .  
تيورلنك ( صاحبخروج مشهور ) ۵۴ ، ۵۵ .  
حسان بن ثابت ( رضى الله عنه ) ۲۲ ، ۲۳ ، ۲۷ .  
حسين ( رضى الله عنه ) ۷ ، ۲۸ .  
سعيد ياشا ( ديار بكرلى ) ۵ .  
سليم ( سلطان ياوز ) ۲۲ .  
سليمان ( سلطان قانونى ) ۱۶ .  
سايمان نظيف ( راقم الحروف ) ۱ ، ۳۳ .  
صلاح الدين ايوبى ( سلطان ) ۲۲ .  
عايشه خانم ( ديار بكرلى سعيد ياشا حليمهسى ) ۳ ، ۴ ، ۵۰ .

کتابده اسمی صراحةً وضمناً مسطور اولانلر

- عرفی شیرازی ( شاعر عجم ) ۲۳ .  
فضولی بغدادی ( شاعر عثمان ) ۱۶ ، ۱۷ ، ۱۹ ، ۲۱ .  
کعب بن زهیر ( رضی الله عنه ) ۲۲ ، ۲۳ .  
محمد ( صلی الله تعالی علیه ) ۶ ، ۷ ، ۲۷ .  
محمود غزنوی ( سلطان ) ۲۲ .  
مراد رابع ( سلطان ) ۲۴ ، ۲۵ ، ۲۶ ، ۲۷ ، ۲۸ .  
مظہر بک ( احمد راسم بککي محمدوی ) ۳۳ .  
نامق اسماعیل بک ( رسام ) ۶۳ .  
نعمان بن ثابت ( امام اعظم ابوحنیفه ) ۹ ، ۲۷ .  
نقی ( شاعر عثمانی ) ۲۹ ، ۳۲ ، ۳۸ ، ۴۳ ، ۴۴ ، ۵۶ .  
یحیی افندی ( شیخ الاسلام شاعر ) ۳۶ .



## فهرست

محتویات	صفحه
آننامه	۴
ایواه ! ..	۶
حسین مظلومه .	۷
دجله و بن	۹
یار ناظم	۱۴
دیار فضولی	۱۹
فضولی بغدادیدن نفی ارضرومه	۲۱
بصره یه بر نیاز	۳۰
ینه او مهجوره یه	۳۱
شهیدك بابایی	۳۳
سبحانك یا محول الاحوال ! ..	۵۴
بردرد قدیمه راجع	۶۱
(کوبا) لیلر	۶۲
فهرست اسامی	۶۴







۴۵۲۰

فیثانی ۳۰ غروش

۴۵۲۰